

BON DIA *Aruba*

Editor

Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #1330772

Hefe di Redaccion

Jaime A. Mata

Redactor Ehecutivo

Zulaica Maduro

Redaccion

Benjamin Romero
Nathalie Winterdaal
Leo Maduro
Nadien Philip
Margarita Els
Nicola Gonzalez
Dino Tromp
Efraim Odor
Fabiola Cardenas

Ehecutivo di Benta

Marijke Croes-Luidens
Mark Gomes
Elly Erasmus

Aviso y Arte

Sandra Loefstop
Lando Rafael
Gladis Palomino-Silva

Administracion

Xiomara Arends (Hefe)
Mariette Engelhart
Martha Arteta de Ariza

Distribucion

Jenny Kelly

Coleccion

Evelinda de Cuba - Tromp

Pre Press

Luis Fernando Arenas (Hefe)
Pablo Libre

Press

Roland Schenker (Hefe)
Omar Ramirez
Martin Boekhoudt
Yair Gambin
Francis Dirks

Colaboracion

Sharina Henriquez
NoticiaCla
Associated Press
Ret Karibense

Afiliacion

Sociedad Interamerica
di Prensa (SIP)

DIRECCION

Weststraat #22

Tel: 582-7800 / Fax: 582-7044

email: noticia@bondia.com

aviso@bondia.com

BON DIA ARUBA

Ta un Corant redacta y imprimi na
Aruba y ta obtenibel di Dialuna te
cu Diasabra. Ningun contenido
por wordo reproduci sin permiso
di Editor. www.bondia24.com

Editorial



Conflicto den Citgo pa via di deal cu Aruba

Citgo no por bay fia mil miyon dollar mas...

ORANJESTAD- Nos no a yega ni na un siman despues di e anuncio di e acuerdo cu Citgo y ya e fiesta di duda y rumor nan a cuminsa. Segun e agencia di noticia Britanico Argus, e parti Mericano di e gerencia di Citgo ta rabia cu e deal cu e Venezolanonan a cera pa e compania. Nan tin miedo cu e deal ta bay afecta e posicion financiero di e compania. Den e editorial aki a muestra recientemente cabariba e debenan biyonario cu Citgo a acumula cerando prestamo grandi pa pasa e placa pa un gran parti pa PDVSA como dividendo. PDVSA mes a pasa e asunto di e deal cu Aruba pa Citgo, ya cu nan no por maneha esaki financieramente. E aña aki so PDVSA tin como 10 mil miyon dollar di debe riba bono pa paga o refinancia, riba cual den medianan internacional financiero tin duda grandi si PDVSA por cumpli cu su pagonan o lo por default den e aña aki.

E acuerdo cu Aruba realmente ta pone Citgo como empresa den problema innecesario, pasobra e empresa cu ta refina y vende producto petrolero riba mercado Mericano, no tin mester di e deal aki pa por sobrevivir. Nan no tin mester di e produccion di crudo mehora di Aruba ya cu nan tin acceso directo na crudo Mericano di excelente calidad pa por opera nan refinarianan. Ta e relacion cu Venezuela, na nivel di e compania madre y di gobierno, ta haci cu e compania tabata na mesa, y manera a resulta awor, na un manera cuestionabel.

Den e caso di e deal cu Aruba, e critica di den Citgo ta cu e CEO Nelson Martinez, hunto cu un abogado ex empleado di Citgo, a tuma na su encargo yega na e acuerdo cu Aruba, sin conocimiento di e resto di e directiva di Citgo. E deal ta hinca Citgo den problema financiero grave den un situacion unda Citgo no por fia mas pa PDVSA, ni pa su mes. Segun fuentenan Venezolano, tabata papia inicialmente di un 450 miyon dollar di inversion, cu diripiente a bira practicamente un biyon di dollar, sin cu e responsabel nan financiero y administrativo di e empresa tabata involucre.

E acuerdo cu gobierno di Aruba lo impone e obligacion riba Citgo pa bay busca otro mil miyon dollar riba mercado pa financiar reapertura di e refinaria como 'upgrader'. Un di e problemanan ta cu den e refinanciamiento di debe reciente pa logra haya placa pa PDVSA, Citgo a compromete su mes cu garantia pa su

acreedornan di tal forma cu lo no ta facil pa simplemente busca mas debe sin cu e acreedornan aki ta cay aden. Ta bay depende di e situacion legal como compania Mericano si lo ta posibel pa gobierno Venezolano, via PDVSA y e dos compania holding na Merca mes cu tin entre Citgo y PDVSA, logra obliga Citgo bay fia placa grandi asina pa financiar algo cu ta contra nan interes economico como persona huridico Mericano. Asina ta parece auto cu e eventual deseo/obligacion di Citgo pa lanta tanto capital pa cumpli cu e acuerdo cu gobierno di Aruba, no ta necesariamente den nan mes man.

Di banda Venezolano, e critica a cuminsa lanta contra PDVSA y gobierno Venezolano, pasobra lo a bay di acuerdo sin aprobacion previo di Asamblea Nacional, unda e oposicion contra Maduro tin un mayoria. Sin duda algun, den e dianan venidero oposicion, cu awor ta mas ocupa cu e accion pa logra destitucion di presidente Maduro, lo bay atende e asunto aki. Cu Venezuela unda gobierno ta na rand di abismo, no ta sigur con esaki ta bay keda. Tambe tin e interrogantenan encunto e construccion di e tubo di gas cu mester bin di Punta Cardón te na e refinaria na Aruba. Esaki, manera nos a comenta anteriormente den e editorial aki, lo mester envolvimiento di e paisnan na nivel mas halto di gobernacion, esta di Reino Hulandes y di Republica di Venezuela.

Na Aruba, cu tur partido politico den parlamento den completo euforia tocante e acuerdo, e aprobacion den parlamento lo no ta mas cu un formalidad, a menos cu e partidonan lanta for di soño y cuminsa realisa cu no ta tur cos ta 'color de rosa' den e asunto aki. Esey ta conta na prome luga pa esnan den oposicion cu durante lunanan a laga gobierno dal bay cu negociacion sin cuestiona practicamente nada, pa awor nan spierta den un situacion diferente. Na e momento aki ta totalmente irrelevante ta ken tin mas merito den e asunto di reapertura, gobierno of e partidonan den oposicion. Loke ta necesario awor ta lanta y cuminsa analisa e situacion aki cu ta parece di tin hopi aspecto scondi aden. Cuidao cu nos no ta bayendo den direccion di un proyecto a la "Race Track", cu por tin yen di consecuencia financiero desagradabel pa nos pais. Atrobe, nos no por haci mucho mas cu exigi di gobierno di practica transparencia y informa comunidad ampliamente tocante e asunto aki. □